



Gudarien etorbidea, z/g 20140 Andoain



zuzendariari@egunkaria.com



943 300 228

OHARRA: Ahalik eta iritzi gehienek izan dezaten tokia, ez da komeni makinazko 15 le-
rro baino luzeago idaztea gutun hauetan. Idatzi duenaren izena, telefonoa, helbidea
eta NAREN zenbakia agertu beharko dira. Laburtu behar izanez gero, zuzendaritzak
bere esku du horretarako eskubidea. Erdaraz iristen diren gutunak ez dira argitaratuko.



zuzendariari

Hamaika arrazoi autoinkulpatzeko

J.M. Zumalabe Fundazioaren eta herri mugimenduen auzian autoinkulpatzeko arrazoiez galdetu diguzuenoi:

Autoinkulpatu gara ez dugulako etsi nahi. Ez dugulako bizi nahi disidentziarako espaziorik uzten ez duen gizarte batean. Ez ditugulako kartzelak kontzientzia presoak bete-
ta ikusi nahi. Ez ditugulako lagun zintzoak sufritzen ikusi nahi. Oraingoz ez dugulako burua nahastu Garzon epailearen literatura fantastikoak. Ikara ematen digulako Mayor Orejaren eta haren kordakoen itsukeriak. Ez digutelako bihotza gogortu ETaren hilketa zentzugabeek. Geure egiten ditugulako biktima guztien malkoak. Ikusten duguna ez delako guk amesten dugun herria. Pentsatu nahi dugulako badirela borrokarako beste modu batzuk. Umore ona eta irribarrea aldarrikatzen ditugulako. Desobedientzia zibilean sinesten dugulako. Egungo ordena aldatzeko ahalegin pazifikoa guztiak zilegi direla uste dugulako. Ideiak onak ala txarrak direlako, baina inoiz ez delitu.

Horregatik guztiagatik izango gara Usurbilen hilaren 11n, eta Iruñeko Auzitegian 18an. **Ana Unanue, Alberto Barandiaran eta Patxi Huarte** • IRUÑEA

Herria mug!

Larunbat honetan Usurbilen Herria mug!-ren deialdiari erantzunez, herri mugimenduaren aurkako muntaiaren salaketan eta mugimendu hauen jarduera eskubidearen defentsan, hainbat lagunek

1.000 atxikimendutara iritsi nahi duen autoinkulpaketa bilketari bultzada eman nahi diogu.

Ekimen honek berezkoa duen elkartasun zentzuaz haratago, herri mugimenduen aldeko jarrera erakutsi eta beren garrantzia azpimarratu nahi dugu.

Autoinkulpak eta kanpaina honen bidez, herri mugimenduaren aldeko konpromisoaz ari gara, herri mugimenduaren jarduteko eskubideaz, euskal gizartearen adierazpideak errespetatzeaz ari gara.

Herri mugimendu hauen jarduteko moldeen balioa eta garrantzia azpimarratzera gatoz, ageriko eta zilegizko jarduera eta helburuen bidez, gizartearen parte hartzea dutelarik helburu eta elikagai, demokraziaren egiazko baloreetan sakontzen duten jarduerak bultzatuz. Alegia, herritarrei bere gizarte ereduaren eraldaketan, eraikuntzan eta garapenean parte har dezaten bideak eskainiz eta ahalbideratuz.

Mugimendu hauek kriminalizatuz, zilegiak, agerikoak eta legezkoak diren jarduerak eta helburuak delitu bihurtu nahi dituzte, baina aldi berean gizartea biziarazten duten zainak dira moztu nahi dituztenak.

Horregatik, larunbat honetan Usurbilera joango gara mila lagunetara iritsiko den autoinkulpaketa bilketari bultzada emateko eta gizarte osoaren eskubide librea dena aldarrikatzera. Mila lagun, lagin bat besterik ez, gaur erreka freskoa dena bihar uholde izango delako esperantza sendoan. **Takolo, Pirritx eta Porrotx** (*pailazo taldea*), **Jon Maia, Jexux Mari Irazu, Xabier Amuriza, Igor Elortza, Unai Iturriaga** (*bertsolariak*), **Gari Berasaluze** (*argitaldaria*), **Fermin Mugu-**

ruza (*abeslaria*), **Joseba Ponce** (*DUT musika taldea*), **Jon Ander eta Imanol Ubeda** (*Bide Ertzean musika taldea*), **Mikel Urdangarin** (*abeslaria*), **Asier Gozategi** (*trikitilaria*), **Josu Camara** (*Kukubiltxo*), **Txiki 'Keixeta'** (*margolaria*), **Andor Hormazuri** (*margolaria*)

Desobedientzia zibila eta intsumisioa

Egia, Justizia eta Oroitzapena taldea osatzen dugun hildako, desgertarazitako eta eraildako militanteen senideok eta adiskideok asteotan desobedientzia zibila praktikatzearren atxilotu eta kartzelatu dituzten beste erakundeetako kideei gure elkartasuna adierazi nahi diegu. Geuk ere intsumisioaren eremuan lan egiten duen herri mugimendutzat daukagu gure taldea, bere ekina gure senideen heriotzen egia argitzera eta justizia lortzera zuzentzen delarik. Era berean, Euskal Herriaren onarpena eta subiranotasuna irabazteko asmoz gure nazio nortasuna eta gure erabakitze gaitasuna ukatzen duten lege, aktuazio, sinbolo eta baloreekiko desobedientzia zibilaren eta intsumisioaren lantokian lanean buru eta bihotz ari diren herri mugimendu guztiak animatu eta aipatu gura ditugu. Azkenik, euskal presoek, iheslariek, deportatuek, errefuxiatuek, torturatuek eta hildako militanteek intsumisioaren aurrera egite honetan emandako laguntza ere gogoratu nahi dugu, aipatutako helburua eskuratzen egindako talde-ahaleginean goreneko graduak lortu eta modu erabakiorrez parte hartu baitute. **Errose Erezuma** • (*Egia, Justizia eta Oroitzapena taldearen izenean*)

galdeiozu...



Joxerra Garzia

[DAZLEA]

Zein bide hartu beharko litzateke euskal gatazkari konponbidea aurkitzeko?

Mikel Perez [Eibar]

■ **NAHIAGO** nuke bide hori eza-gutuko banu. Susmoa dut, ordea, izan ere ez dela horrelakorik. Bidea, alegia, egiteko dagoela, ez dela lehendik hor dagoen bidea. Bestek ibilitako bideetatik zerbait ikas dezakegu, noski, (Irlandatik, adibidez), baina geure bide propioa egin egin behar dugu. Horretarako, nik uste, borondatea behar da, ororen gainetik: bidea egiteko borondatea. Bideak, ordea, paisaiaren arabera egin behar dira. Puntu batetik besterako bide zuzen-zuzenek (norberak ez bezala pentsatzen dutenak fisikoki zein mediatikoki suntsitzea, adibidez) ez gaituzte inora eramango. Ortzadarra zuribeltzean margo-tu nahi izatea bezala litzateke hori.

Azaroaren 13tik aurrera
Tomas Urzainki

• HISTORIOLARIA

izango da Galdeiozu ataleko gonbidatua.
Bidali zure galderak ordurako.

• MONTXO •

